



SAOPĆENJE ZA JAVNOST

Tužilački epilog akcije Čestica **Otkriveno jedanaest koruptivnih radnji**

Tužilaštvo Brčko distrikta BiH podiglo je optužnicu protiv Amera Korjenića (48)*, službenika Ureda za upravljanje javnom imovinom u ovom gradu, zbog sumnje da je iskorištavanjem službenog ovlaštenja pribavio imovinsku korist veću od 40 000,00 KM. Korjenić je optužen za zloupotrebu položaja ili ovlaštenja počinjenu tako što je veće iznose novca, koji su mu za administrativne takse i naknade predavale stranke, zadržao za sebe.

Stručnom referentu za identifikaciju i procjenu objekata javne imovine stavljeno je na teret da je od sredine 2018. g. pa sve do jula 2020.g. zahtijevao i uzimao novac na ime naknada i taksi, a zatim ga umjesto uplate u budžet Distrikta zadržavao za sebe. Naime, on je na preporuku trećih osoba ili koristeći poznanstvo, uspostavljao komunikaciju sa strankama koje su imale potrebu rješavanja različitih imovinskih odnosa sa distriktom Brčko. Sumnja se da je tako po jedanaeset pojedinačnih zahtjeva za izdavanje građevinske dozvole, legalizaciju bespravno izgrađenih građevinskih objekata, dokompletiranje parcela i prodaju državnog zemljišta, kao i zakup poslovnih prostora, zahtijevao i sebi uzimao uglavnom po nekoliko hiljada KM, prisvojivši u jednom slučaju čak 14 400,00 KM. On je na taj način pričinio štetu strankama, a sebi pribavio imovinsku korist u ukupnom iznosu od 41 360,00 KM - navodi se u optužnici koju je potvrdio Osnovni sud Distrikta.

Nakon hapšenja u policijskoj akciji Čestica prošle godine u vezi s legalizacijom zemljišta za više lica kod Tržnog centra FIS i sudskog odbijanja prijedloga za njegovim pritvaranjem, Korjenić je pušten na slobodu. Međutim, Tužilaštvo je s Policijom Distrikta nastavilo, dopunilo i uspješno sprovelo opsežnu antikorupcionu istragu u ovom predmetu prikupivši dokaze za jedanaset koruptivnih radnji optuženog javnog službenika. Nastavljajući procesuiranje korupcije u javnim službama, Tužilaštvo Distrikta optužilo je Korjenića za teži oblik Zloupotrebe položaja ili ovlaštenja (iz člana 377 stav (2) Krivičnog zakona Brčko distrikta BiH), s propisanom kaznom zatvora od jedne do deset godina. U međuvremenu je za ovaj oblik krivičnog djela, u odvojenom slučaju, a zbog propusta u obračunu i naplati naknada za geodetske usluge u iznosu od oko trinaeset hiljada KM, dvoje državnih službenika nepravosnažno osuđeno na po godinu zatvora.

*Preduzimanje radnji krivičnog gonjenja prema određenom licu ne znači da je to lice zaista i odgovorno za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.

Tužilaštvo Brčko distrikta Bosne i Hercegovine, 15. oktobar 2021. godine

GLAVNI TUŽILAC

ZEKERIJA MUJKANović